

親征平定朔漠方略

五

親征平定朔漠方畧卷之七

七月庚寅朔。

命科爾沁土謝圖親王沙津候諸路軍至齊發。沙津遣署副都統蘇爾米二等護衛根都等在偵噶爾丹。至察克墩登高望之。見噶爾丹前哨次第屯列。且望見其營壘甚近。沙津卽率所備兵前進。具奏以

聞。

上諭曰。大兵陸續前進。朕亦親往。姑勿與戰。以待各路軍至齊發。毋致失利。其檄王沙津知之。

辛卯。

命和碩裕親王福全爲撫遠大將軍。和碩恭親王常寧爲安北大將軍。時噶爾丹深入烏朱穆秦地。

上命和碩裕親王福全爲撫遠大將軍授以印。皇長子胤禔副之。出古北口。和碩恭親王常寧爲安北大將軍授以印。和碩簡親王雅布多羅信郡王鄂札副之。出喜峯口。內大臣國舅佟國綱佟國維內大臣索額圖明珠阿密達都統蘇努拉克達彭冲阿錫坦諾邁護軍統領苗齊納楊代前鋒統領班達爾沙邁圖俱叅贊軍務。諸軍前

發。惟佟國維。索額圖。明珠。畱京。俟大將軍將至。陰山馳往會之。

頒發軍令。

上諭兵部曰。本朝自

列聖以來。戰必勝。攻必克。所向無敵者。皆以賞罰明。法制嚴。兵卒精銳。器械堅利。人思報國。殫心奮勇。之所致也。今軍行。其令各該都統以下。察核軍

實。凡甲冑弓矢諸器械。務令犀利堅好。其盛甲俱繫號帶。馬駿尾書旗分佐領姓名。其行也。視大纛整隊齊發。有零星前後錯行。及醉酒者。該管官立拿懲責。其止也。各按旗分隊伍。分列屯扎。有前後錯亂者。罪及該管大臣。馬無印箭。無名。各罰以銀。給拿獲者。竊取鞍轡什物馬匹者。視其多寡治罪。失火者。亦從重究懲。官兵廝役。

所過百姓蒙古地方。毋騷擾。毋搶掠。毋踐踏。有
擅離營伍。入村落山谷。奪人財物者。軍法從事。
罪及本主。及該管官。軍士廝役逃亡。在喀倫內
立行察拿治罪。如出喀倫外。該管大臣。卽遣官
兵窮追務獲。立斬以徇。如不能獲。則將往追將
卒從重治罪。其逃人之主。及該管官。一并嚴行
察懲。旣出我境。哨探斥候。務期嚴密。如曠野交

兵對陣見敵。王貝勒貝子公大臣不按次序攙
越前進。及見賊兵寡弱。不復請令冒昧前進者。
有功不叙。仍治以罪。其進也。須齊列緩轡。按隊
前行。如自離其隊而附人後。或自棄其伍而入
別行。或他人已入而獨畱不進。身死家沒。及重
責革罰。分別治罪。如整齊而進。擊敗賊兵。厥功
維均。勿以畧分先後致生爭競。至彼不抗我軍。

而奔潰。則選精兵良馬逐之。列隊躡踪而進。如
前忽遇伏。或賊兵有旁抄者。則後隊接戰。夫兵
者。所以討逆而安順也。領軍大臣。果能嚴束其
下。不使良民受害。朕不靳厚賞。否則罰亦無赦。
凱旋之日。有以兵器私售蒙古者。本人治罪。并
及該管官。馬乃大軍急需。須視水草善地。小心
護養。起行時。則畱將卒察收遺失之馬。視駿尾

所繫字樣交還原主。如係疲馬。則開明馬色數目。交所在官司人民蒙古善行牧養。報知兵部。如有匿而騎用。及殺之棄之者。治以罪。其遺馬疲馬之人。亦開明馬色報兵部存案。恐官兵未能遍知。爾部其刊布曉諭之。

臣
謹按我

國家兵制至善。軍法至嚴。亘古所不及。

親征平定朔方方略卷之三
皇上智勇天錫。以守成兼開創。嗣位以來。平三藩。收海孽。定察哈爾之亂。

天戈所指。捷如雷霆。蠢茲噶爾丹。無知逆命。

皇上震電憑怒。乃遣將出師。申嚴教誡。才百餘言耳。而坐作進止之方。竒正勦禦之法。莫不燭照數計。纖悉靡遺。不待秉鉞擁旄。而早已決勝萬里之外矣。抑又聞之。兵者聖人不

得已而用之。以除暴安民而已。故曰桓文
之節制。不如湯武之仁義。仁義者所由制
勝無敵之資也。今誕告有衆。所諄諄往復
者。惟以禁侵掠安良善爲至計。故師行所
至。民不知兵。市不改廛。野無失業。其真所
謂聰明睿智神武而不殺者與。

命發大同綠旗官兵。兵部奏言。大將軍裕親王等

奏殺虎口密邇歸化城請撥大同綠旗兵前
赴以聽調遣。應如王等所請。於大同鎮標選
馬兵六百。步兵內或藤牌或火器一千四百。
令將領率之。於七月初十日內至殺虎口。其
總兵官王璧尙未受事。或徑赴大軍。或仍畱
大同應候。

旨行。

上曰。此所撥兵。係鮑敬舊轄。卽令率之前往聽調。王
璧蒞任後。仍畱防守地方。

命隨大軍設站。

上諭理藩院曰。大將軍裕親王率大兵出古北口。其
令侍郎薩木哈學士布顏圖。自阿爾尼設站分
路之處。酌撥附近旗分人馬。尾隨大軍。設立驛
站。

壬辰。

命內大臣阿密達軍暫駐岡阿。副都統噶爾馬率兵往會阿爾尼等。六月二十七日。至阿霸垓。聞前軍已與噶爾丹交鋒。乃遣人探兩尙書所在往會之。以兵力單弱。便宜於附近調察。哈爾左翼四旗兵。每旗百名以行。越二日。與阿密達軍會於岡阿。具疏以

聞得

旨。前已調發察哈爾兵八百。左翼兵無庸再調。今撫遠大將軍將出塞。應令阿密達等暫駐岡阿。偵明蘇努軍行實信。與之齊赴克勒。以候大將軍至。如聞厄魯特內向。卽回與大軍合。其檄知之。

命奏報軍情。許大將軍等閱視。大將軍裕親王等

奏言。臣等既身率重兵。其切近噶爾丹處。奏

報機宜。似宜備文。令臣等知之。

上曰。軍機於爾等豈有所秘哉。但另文則未免煩複。且恐遲延。自後奏報軍機。皆令馳赴軍前。爾等接視封進。有所見。卽附奏以

聞。

諭尚書阿爾尼等。遣人迎都統額黑訥軍。